

Lo distu pr da bon
 Ch' i t' abie l' intension
 D' veuleime pr toa sposa ?
 Che cara arsolussion !
 Via là comensme dè
 Loli ch' ant 'l papè
 T' as dit ch' i t' m' as portà.
 Saria un trat vilan
 Quand j' arfudeis toa man,
 I veui pa ch' i t' lamente
 D' aveilo portà an van.
 Pr coust l' è un bel argal,
 N' eu mai avune un tal
 Da tuti i me sfojor.
 I t' ses bin generos,
 Amabil e grasios,
 A j' è nè Re, nè Prinsi
 D' un cheur cosi grandios.
 Pr lo ch' l' è dla mia gent
 Saran pro tuti content,
 J' è pa da dubità;
 Così l' afè l' è anteis;
 Fra quatr o sinchsant meis
 Ven via ch' acomodroma
 D' empite 'l cul d' apeis.

**Dialogo sopra il contrasto di due Figlie,
 che hanno un solo Amante tra tutte due.**

CANZONE X.

Sa sa chi l' ha veuja d' rie,
 Son bele drolarie
 Da stampeje,

Da tacheje
 Sui canton,
 Da tacheje sui canton.
 J'è doe fie d'un drolo umor,
 Tra tute doe l'han ch'un sfojor;
 S' veulo desse,
 Ciarpignesse,
 E gavesse j'eui tra lor.
 Una l'ha nom Biasinna,
 E l'otra Giacominna,
 Tute doe
 Brute loe
 Ch'a fan por,
 Brute loe ch'a fan por.
 Oh! s'i vedeisse coui mostassin,
 Son da dipinse su doi bronsin,
 Cose nobil
 Pi che sti mobil
 Ai son nen ant sti confin.
 Una dis: mi i son bela
 Veui pa usè d'rasparela;
 Levvlo pura
 Pr sigura
 Dal gabus,
 Pr sigura dal gabus,
 Coust boconat a fa pa pr ti.
 Sastu ancor nen ch'a ven manch pr mi?
 T'ses pur fola,
 T'ses pur drola
 A marcè su 'l fus cosi.
 Oh! che forslue blesse,
 T'ses del color dle vesse,
 T'm'fas rie
 Quand i t'die
 Ste rason,
 Quand i t'die ste rason;

Mach a buchete le gent han sgiai,
 La gran bagianna ch'i t' ses peui mai!
 Sta ampò cacia
 Scrousa e nacia,
 Vate a sconde ant ij fossai.
 Oh povra mamalucca!
 I t' ses una trluca,
 Va stermete,
 Va cogete
 Drint a un gioch,
 Va cogete drint a un gioch;
 Con coul to bel color pavonas
 Ch'a fa pagura fin ai crovas;
 Macaronna,
 Sfrontadonna,
 Fate arfonde coul mostas.
 S' i son bin ampò brunna,
 Mi temo pa la lunna,
 J'eu mei testa,
 Son pi lesta
 Ch'i t' ses ti,
 Son pi lesta ch'i t' ses ti;
 Mi n'eu pa manca d'feme rablè
 Com'i t' fas ti, ch'i t' ses un busè;
 Oh tripassa,
 Bagianassa,
 Com' ancalstu ancor parlè?
 Quandbin i sia sopa,
 I son pa nen salopa,
 Nè stransia,
 Nè splufria
 Tant com' ti,
 Nè splufria tant com' ti;
 Buchte ampò ti con to bel gavas,
 Ch'a t' ha giumpai cuvert 'l mostas.
 E ti t' cherde

D' femla vede,
 E d' voleime ancor piè 'l pas?
 S' mi i son dla gola grossa,
 Ti t' ses d' ij pè ant la fossa;
 E t' as veuja,
 Bruta treuja,
 D' un mari,
 Bruta treuja, d' un mari?
 Ma chi saralo coul bagianas
 Ch' a veuja piasse tant ambaras
 D' una ciorgna
 Mesa borgna,
 E dernà com' un babias?
 Oh! che descours da gnoca,
 Da gonza e da massoca!
 T' ses na tofa,
 E una gofa
 Spensierà,
 E una gofa spensièrà;
 Ma sastu nen con la dota ch' ij ai
 Ch' i peus curvime tuti i me mai?
 J' eu d' bagagi,
 J' eu 'l fardlagi
 Senza lo ch' ij ereditrai.
 Dont astu coula dota?
 Ela stermà ant la crota
 Drint la bota
 Ch' i t' as sota
 La baral,
 Ch' i t' as sota la baral?
 Fame un pò vede coul to fardel,
 Venta ch' a sia quaicosa d' bel,
 Malanagi
 Sia ai bagagi!
 I t' as gnanch un stras da barbè.

La pest a la bagassa !

Cos' astu ti mascassa ,

D' ampacete ,

Da crussiete

Del fait me ,

Da crussiete del fait me ?

Com' astu ti da fichè to nas ?

Mostra , carogna , ti lo ch' i t' as ;

T' ses na vera

Paterlèra ;

Va ampò là , brut luv ravas .

Porcassa maladeta

Adess adess aspeta

T' veui mostrete ,

T' veui butete

Giù coui dent ,

T' veui butete giù coui dent ;

E con chi cherdstu aveje da fè ?

Chi t' ha mostrate 'l meud d' tratè ?

D' mincionete ,

D' cansonete

Dla manera del fait me ?

Cos' elo ch' i t' die ?

Mostas da feme rie ,

Sfrontadassa ,

Galupassa

Ch' i t' ses ,

Galupassa ch' i t' ses ,

Pensestu forse d' feme quajè ,

Con toe mnasse , e con to brajè ?

S' i t' pio ,

Mi t' strio ,

Ch' i t' podrass pi gnanch bajè .

Lassè ampò mi ch' i dia

La volontà ch' j' avria ,

A l'è d' pieje,
 E campeje
 S' un liamè,
 E campeje s' un liamè;
 Podria desse ch' a coul odor
 Forsi cambieisso coul bel umor,
 E ch' l' anvia
 J' andeis via
 D' ingiuriesse pr d' sfojor.

Da cantarsi a tavola per bere.

CANZONE XI.

Orsū voi atri tuti dla brigada
 Guardè la povra doja a stè d' bada;
 Elò pa una vergogna a divlo an rima,
 Chi na fasse tuti si poca stima?
 O via là, comensè voi compare,
 Tra tant ste tuti bin atent ch' i ampare.
 E peui pi prest la pansa cherpa e sciopa,
 Ch' neu beive tuit apres criand e topa.
 E coul ch' a bevrà nen la sanna pienna,
 A bevrà n' altra vota pr soa penna.
 O via beive pur, che bon pro v' fassa,
 Ma gara s' quaicadun i laver s' pnassa.
 E chi trasgredirà sta lege scritta,
 Coul li pagrà pr tuti l' eva d' vita.
 Prchè i veuloma pa ch' gnun a dia
 Ch' i sio andait a beive antorn dla sia;
 Ch' an conclusion a l' è pa gnanch vergogna
 Portè la bela ansegna dla bronsogna.
 Così la gent na farà pa miraco
 S' i s' diciaroma tuit scolè d' Baco.
 A noi, me cari fieui, ch' la doja rola,
 I seu ch' nessun patis 'l fum d' raviola;